

Gereformeerde Kerk Bellville – 3 Maart 2019 – Aand

Sing vooraf staande: Psalm 147:1, 2 (p. 704)

- 1 Laat voor die HEER 'n lofsang rys! / Hoe goed is dit om God te prys!
Hoe lieflik om die lof te sing, / die lof wat ons aan Hom moet bring!
Want Hy wil ons in guns aanskou, / Hy wil Jerusalem herbou
en Isr'el wat verstrooid nog swerf, / versamel op die heil'ge erf.
- 2 Hy heel gebrokenes van hart, / en Hy verbind hul in hul smart.
Sy oë speur oneindig ver; / Hy tel en roep die laaste ster;
sy krag en kennis, ongemeet, / oorwelf al wat ons ken en weet.
Sagmoediges verhef Hy weer, / maar goddeloses werp Hy neer.

Ons hulp is in die Naam van die Here wat die hemel en die aarde geskape het.

Geliefdes, genade en vrede vir u van God ons Vader en die Here Jesus Christus deur die kragtige werking van God die Heilige Gees.

Amen.

Psalm 145:1, 2, 3 (p. 696)

- 1 U Naam, o HEER, so hoog in heerlijkheid, / wil ek verhef vir ewig en altyd;
u Koningseer wat alle krone oorstraal, / wil ek verhoog in onvermoeide taal.
- 2 Die HEER is groot, daar is geen sanggeluid / wat ooit sy lof in volle waarde uit!
Dit is 'n see waar niemand in kan meet, / dit is 'n vloed waar ons geen grond van weet.
- 3 Omdat, o God, in dié geheimenis / vir ons vernuf geen grond of einde is,
daarom prys ons u wêrk, u dáád van krag, / van kind tot kind, tot in die nageslag.

Gebed

Psalm 97:1, 4 (p. 484)

- 1 God heers as hoogste HEER; / die aarde moet Hom eer,
en juig, saam met die strande / van afgeleë lande.
Daar's wolkedonkerheid / rondom sy majesteit;
sy rykstroom is gestig / op oordeel en gerig / en op geregtigheid.
- 4 Beskaamd word alle siel / wat voor die beelde kniel,
met lofwoord en gebede / gerig tot nietighede.
Hoog bo hul sit die HEER; / Hy's God, en niemand meer!
Hul buig hul, diep en stom, / die ganse godedom, / voor God se grootheid neer.

Skriflesing Deuteronomium 6:1-5; 1 Samuel 15:1-35;
Nederlandse Geloofsbelydenis, Artikel 1

Kernvers: Deuteronomium 6:4; 1 Samuel 15:29, 11a, 35b

Hoor, Israel, die HERE onse God is 'n enige HERE.
(Deuteronomium 6:4 AFR53)

En ook lieg die Roem van Israel nie, en Hy ken geen berou nie; want Hy is geen mens, dat Hy berou sou hê nie.

Ek het berou gekry dat Ek Saul koning gemaak het, want hy het van My afvallig geword en my woorde nie uitgevoer nie.

En die HERE het berou gehad dat Hy Saul koning gemaak het oor Israel.
(1 Samuel 15:29, 11a, 35b AFR53)

Nederlandse Geloofsbelydenis

Artikel 1

Die enige God

Ons glo almal met die hart en bely met die mond dat daar 'n enige en enkelvoudige geestelike Wese is wat ons God noem. Hy is ewig, onbegryplik, onsienlik, onveranderlik, oneindig, almagtig, volkome wys, regverdig, goed en die alleroorvloedigste fontein van alles wat goed is.

2 Kor 3:17; Joh 4:24; Jes 40:14.

Tema: Die troos om te weet God is onveranderlik

Geliefdes in ons Here Jesus Christus, God is groot en almagtig en ons is maar net mense. En wanneer ons oor God wil praat, staan ons verbysterd. Waar sal 'n mens tog begin? Ongelowiges sal sommer wil begin redeneer oor die bestaan van God. Ons gelowiges het 'n heilige huiwering om oor God te praat, want ons weet ons woorde sal nooit reg aan God laat geskied nie. As volledigheid 'n vereiste was om die waarheid aangaande God te vertel, sou swyg die beste wees. Hoe sou die mens immers met sy beperkte verstand die Wese van God kan beskryf terwyl ons nie eers met sekerheid kan vasstel hoedanig die son is wat ons elke dag kan sien nie?

Wie God wil leer ken sodat hy aan ander mense kan vertel wie God is, is dit die beste om stil te sit en te luister na wat die Here van Homself vir ons openbaar. En wanneer die Here Homself met sy Woord aan ons bekend maak, hoor ons nie koue wetenskaplike teorieë en bewyse oor wie God is nie. Ons hoor eerder hoe God is in sy werke en woorde teenoor sy skepping.

Die eerste wat ons van God leer ken, is dat Hy Skepper is. Mettertyd leer ons Hom in Christus ook ken as Vader wat in die hemel is. Wanneer jy dan iemand anders van die Here vertel, kan jy maar net sê wat die Here self in sy Woord van Homself vir ons sê. Meer as wat die Here sê, kan ons en mag ons nie sê. En 'n gelowige behoort ook nie stil te bly nie. Wie in God glo en deur die Heilige Gees se werk al geleer het om God lief te hê, sal nooit kan stilbly nie. Daarom sê ons: ***Ons glo almal met die hart en bely met die mond dat daar 'n enige en enkelvoudige geestelike Wese is wat ons God noem.***

Van die vroegste tye af van Israel se bestaan het die Here dit by sy volk ingeskerp:

Hoor, Israel, die HERE onse God is 'n enige HERE. (Deuteronomium 6:4 AFR53)

Die Israëliete het tussen volke en nasies gewoon waar elke volk en nasie sy eie god gehad het. En vir elke denkbare ding in hulle lewe het hulle 'n ander afgod gehad om te aanbid. Omdat die Here wil hê dat sy volk die waarheid sal ken en glo, het Hy dit by hulle ingeprent dat Hy die enigste God is.

By herhaling het die Here hierdie feit dat Hy die enigste God is by Israel ingeskerp, want dwarsdeur hulle geskiedenis sien ons hoe hulle in afgodery verval het. Dit is veral by die profete, Jesaja en Jeremia, waar ons hoor dat die Here kort-kort sê dat Hy die enigste God is. Die Here sê by monde van Jesaja:

Ek is die Eerste, en Ek is die Laaste, en buiten My is daar geen God nie.
(Jesaja 44:6 AFR53).

Daar is niks en niemand wat met God vergelyk kan word nie, want net Hy alleen is God en niemand meer nie.

Vandag het ons 'n soortgelyke belewenis as Israel van destyds. Ons word aangesê om nou maar eenmaal te aanvaar dat daar baie verskillende godsdienste met hulle eie gode in ons land is. En die owerheid wil hê dat ons kinders van hierdie gode en godsdienste moet leer. Kinders, julle kan maar hoogstens kennis neem van hierdie verskillende godsdienste met hulle baie gode. Maar weet beslis dat daar nie ander gode is nie, dit is net mense se eie uitvindings. Daar is net een waarheid en dit is die waarheid wat die Here self vir ons gee: Die Here ons God is die enigste God. Daarom bely ons dat God **die enigste geestelike Wese is wat ons God kan noem**.

God is **ook 'n enkelvoudige geestelike Wese**. Die woorde in Deuteronomium 6:4 kan ook soos volg vertaal word: *Luister, Israel, die Here is ons God, die Here is een*. God is een, daar is nie verdeeldheid in Hom nie. Hy is nie nou so en netnou weer anders nie. Hy is nie nou anders as wat Hy vroeër in die tyd van Israel of Paulus was nie en in die toekoms sal Hy nie anders wees as wat Hy tans is nie. Hy bly altyd een en dieselfde God soos wat Hy Hom aan ons openbaar. In al sy woorde en werke bly God een en dieselfde, want Hy is enkelvoudig.

Kom ons stel dit nog eenvoudiger. In die Nuwe Testament hoor ons Johannes sê:

God is liefde (1 Johannes 4:8 AFR53).

Dieselfde Johannes skryf in dieselfde brief:

God is lig (1 Johannes 1:5 AFR53).

'n Mens kan nie uit hierdie woord aflei dat God in een stadium liefde is en weer in 'n ander stadium lig is nie. God is nie nou regverdig en op 'n ander keer weer barmhartig nie. Vir die mens wat so 'n verdeeldheid in God sien, gaan daar spanning kom, want vir hom ontstaan daar 'n spanning tussen die eienskappe van God. Dit is hierdie mens wat nie kan en wil aanvaar dat daar uit die God van liefde se hand ook oordeel en straf kan kom nie. Die mens wat God se barmhartigheid teenoor God se regverdigheid stel, verval in 'n stryd met God omdat hy nie wil aanvaar dat God tegelyk regverdig en barmhartig kan wees nie. Dit is hierdie soort mens wat dit waag om God tot verantwoording te wil roep met 'n vraag soos die volgende: Here, hoekom lyk die wêreld so? Dit is 'n vraag wat gevra word omdat die mens nie wil aanvaar dat God volmaak regverdig en terselfdertyd volmaak barmhartig is nie, en omdat die mens nie kans sien om sy eie swakheid en sonde te erken nie.

Om uit hierdie soort spanning te bly, is die enigste oplossing om God te ken soos Hy sê Hy is. As Hy sê dat Hy liefde is, bedoel Hy dat Hy geheel en al liefde is. As Hy sê dat Hy regverdig is, bedoel Hy dat Hy geheel en al regverdig is. En Hy is liefde, regverdig, barmhartig en lig tegelykertyd, want Hy is enkelvoudig. Daar is geen verdeeldheid in God nie. En as God liefde gee, gee Hy Homself. Hy het Homself in sy Seun aan ons gegee omdat Hy die wêreld wat Hy geskep het, liefhet.

In Artikel 1 van ons Nederlandse Geloofsbelydenis bely ons verder hoe God is, naamlik **ewig, onbegryplik, onsielik, onveranderlik, oneindig, almagtig, volkome wys, regverdig, goed en die alleroorvloedigste fontein van alles wat goed is**. Met die eerste aanhoor van hierdie woorde klink dit ook maar vreemd en miskien soos woorde oor God. Maar, geliefde broers, susters en kinders, dit is allermins wat hierdie woorde vir ons behoort te wees, want dit is ek en jy wat hierdie woorde aangaande God bely. Vanaand gaan ons terug na die Skrif om te verstaan wat ons regtig bely as ons sê dat God

onveranderlik is.

Wanneer die Here van Homself sê dat Hy onveranderlik is, wil Hy nie hê 'n mens moet verstaan dat Hy koud en emosieloos is nie. *Onveranderlik* beteken dus nie iets soos 'n stand-beeld wat in sonskyn en reën maar net dieselfde uitdrukking op die gesig het nie. God is verhewe bo sy skepping, maar Hy is nie onaangeraak oor wat op die aarde gebeur nie. Mense se sondes vertoorn Hom en die Heilige Gees word daardeur bedroef. Wanneer jy God as Vader leer ken, leer jy Hom ken as die God wat intens betrokke is by die mense wat Hy as sy kinders aangeneem het.

Dit is in 1 Samuel 15:29 waar ons hoor dat God onveranderlik is. Luister hoe sê die Here dit:

En ook lieg die Roem van Israel nie, en Hy ken geen berou nie; want Hy is geen mens dat Hy berou sou hê nie. (1 Samuel 15:29 AFR53)

In teenstelling met 'n mens wat maklik in sy houding teenoor ander mense kan verander en spyt kan kry omdat sy besluite verkeerd was, verander die Here nie teenoor die mens en die skepping nie. God bly altyd dieselfde – Hy bly altyd wat Hy is, want Hy is wat Hy is. Wat Hy sê, doen Hy. Hy maak klaar waarmee Hy begin het. Hy is nie nou sus en netnou so nie, want ons God is nie wispelturig soos wat 'n mens kan wees nie.

Dit is by hierdie woorde in 1 Samuel 15 waar ons aansluit wanneer ons sê dat God onveranderlik is. Omdat God onveranderlik is, is dit vir ons 'n troos en 'n sekerheid. As Hy eenmaal van 'n mens gesê het dat hy sy kind is omdat Jesus Christus vir sy sondes gesterf het, is daardie mens vir altyd sy kind. Hy gaan nie hierdie besluit van Hom omkeer of herroep nie. Die Here gaan nie terug op sy woord nie. Daarom kan jy op die beloftes van God vertrou, want as Hy gesê het dat Hy iets gaan doen, kan jy maar seker weet dat Hy dit sal doen, want Hy is onveranderlik.

Indien God veranderlik was, sou ons nie in staat wees om Hom te vertrou nie. Indien God veranderlik was en jy sy guns moes wen deur allerhande dinge te doen, sou jy maar bejammerenswaardig wees. 'n Mens sou heelyd moes skarrel om God gunstig teenoor jou te stem en nooit sal jy vir seker weet of jy nou sy guns gewen het of nie. Indien God wispelturig was, sou kommer 'n mens lewe oorheers. Maar nou is God onveranderlik. Hy het eerste liefgehad. Mense het nie nodig om sy liefde te wen nie. Omdat jy God kan vertrou, kan jy al jou kommer aan Hom bekend maak en by Hom los sodat jy in vrede kan voortgaan om Hom ongehinderd te dien.

Tog moet ons ook daarop let dat God onveranderlik is wanneer dit kom by die oordeel wat Hy oor die hardnekkige sondaar uitspreek. Saul het tevore al die Here se Woord oortree deur 'n offer te bring wat hy as koning nie mag gedoen het nie. Ondanks hierdie oortreding, was die Here steeds genadig teenoor Saul en Hy het hom weer 'n kans gegee. Die Here het aan Saul opdrag gegee om die Amalekiete met die banvloek te gaan tref. Hy moes alles en almal wat lewe gaan doodmaak, maar Saul doen dit nie. Selfs nadat die Here nog 'n kans aan hom gegee het om gehoorsaam aan die Here te leef, volhard Saul in sy ongehoorsaamheid en eiewilligheid. Omdat hy die Here se woord nou aanhoudend verwerp het, verwerp die Here hom. En die Here is onveranderlik. Hy sal nie soos 'n mens spyt kry oor hierdie besluit nie.

Vir mense van die een en twintigste eeu klink hierdie woorde hard en wreed. Maar ook hier kan 'n mens sekerheid en troos vind. Die Here is nie wispelturig oor die sonde nie. As Hy gesê het 'n ding is verkeerd, kan ons maar seker weet dit is verkeerd, want God is onveranderlik en bestendig in sy woorde en werke. Hy sien nie nou 'n sonde oor, maar mōre

straf Hy oor daardie selfde sonde nie. Omdat die Here onveranderlik is, weet ons waar ons met die Here oor sonde staan.

Maar nou lees ons ook in 1 Samuel 15 op twee plekke dat die Here sê dat Hy berou gekry het dat Hy vir Saul koning gemaak het (1 Samuel 15:11, 35). Weerspreek die Here Homself dan nou of wat moet ons hier verstaan? Geliefdes, die mens wat redeneer dat om onveranderlik te wees is soos 'n standbeeld, sal inderdaad sê dat die Here Homself weerspreek. Aan die ander kant, die mens wat nie wil aanvaar dat God bestendig is in al sy werke en woorde nie, maar veranderlik, sal oor hierdie twee verse in ons hoofstuk sê dat God maar net soos 'n mens berou kan kry oor 'n besluit wat nie afgeloop het soos Hy dit graag wou hê nie.

Teenoor hierdie tweede mens kan ons met vrymoedigheid terugwys na die woorde van die Here in vers 29. Die Here is nie soos 'n mens dat Hy spyt kry oor sy besluite nie, want sy besluite is nooit verkeerd nie. Dit is net ons mense wat besluite kan neem en eers later agterkom dat dit 'n verkeerde besluit was en dan spyt wees oor daardie besluit.

Teenoor die eerste mens wat redeneer dat God onveranderlik is en daarom ook onbeweeglik, wys ons hom op vers 11 en 35 van ons hoofstuk. Die Here is nie ongevoelig oor wat op die aarde met sy mense gebeur nie. In menslike taal sê die Here vir ons wat in sy hart gebeur wanneer sy mense moedswillig en hardkoppig besluit om nie aan Hom gehoorsaam te bly nie. Dit maak Hom bitterlik bedroef dat die mens so hardkoppig kan wees, want Hy wat God is, is onveranderlik regverdig. Hy kan en sal nooit die sonde oorsien nie. Omdat Hy heilig en regverdig is, sal Hy die sonde regverdig straf. Die Here is bedroef omdat Hy Saul koning gemaak het, want Saul het al die woorde van die Here oor hoe 'n koning moet optree hardnekkig en aanhoudend verwerp, selfs nadat die Here weer 'n kans aan hom gegee het om gehoorsaam te wees.

Broers, susters en kinders, as ons sê dat die Here onveranderlik is, sê ons nie dat Hy ongevoelig is nie. Selfs nie eers oor Saul wat hardnekkig in sy sonde volhard, is die Here ongevoelig nie. Inteendeel, Saul se hardkoppigheid het die Here bitter bedroef gemaak, want die Here het 'n lewende, persoonlike en intieme verhouding met sy mense en die skepping. Ook in sy verhouding en betrokkenheid met sy mense is die Here onveranderlik en bestendig. As Hy sy verbond met sy mense oprig, sê Hy dit is 'n ewige verbond. En in sy verbond verbind Hy Homself aan sondaars wanneer Hy sê: Ek is julle God. Omdat Hy aan hierdie woorde van Hom getrou bly, onveranderlik bly, word Hy bedroef oor ons sondes.

Geliefdes, die verhouding wat die Here met sy mense het, is vir Hom so belangrik dat Hy Homself beweeg het om sy eniggebore Seun vir sy mense oor te gee. En Christus het Homself verneder en mens geword om die droefheid en verskeurdheid van die sonde op Homself te neem. Die Here raak in sy Seun, Jesus Christus, sigbaar betrokke in hierdie gebroke wêreld vol stukkende mense sodat Hy hierdie wêreld en sy mense kan heelmaak. Die Here doen dit, want Hy is onveranderlik in sy besluit om mense van die Satan se heerskappy en van hulle sonde te verlos.

Mag die Heilige Gees hierdie geloof aan jou en my hart verseël sodat ons te midde van al die afgode en sogenaamde gode hardop kan bly bely dat die Here ons God die enigste Here is. Mag die Heilige Gees jou en my aanhoudend vertroos met die wete dat ons God onveranderlik is.

Amen!

Slotgebed

Psalm 119:51, 52 (p. 596)

- 51 HEER, u woord, dit is gelouterd / en bemind deur my, u kneg,
wat, hoewel hy klein, verag is, / nog aan u bevel bly heg.
U geregtigheid bly ewig, / onveranderlik bestaan,
en u waarheid is 'n waarheid / wat nie wankel of vergaan.
- 52 As ek wandel in benoudheid, / en in diepe angs geraak,
is u woord die een en alles / waar my hart hom in vermaak.
Ewige geregtighede / vloei uit u getuienis.
Leer my daaruit so te lewe / soos die ware lewe is.

Die genade van ons Here Jesus Christus, die liefde God die Vader en die gemeenskap van die Heilige Gees sal met elkeen van julle wees en bly.

Amen.

Ds Coenraad Vrey
Gereformeerde Kerk Bellville
3 Maart 2019